

東
華
續
錄

東華續錄

乾隆六

臣王先謙敬編

臣周倫蕃恭校

秋七月戊子以渾河水發派侍衛策楞五十七等各帶銀二千兩
分往盧溝橋良鄉撫恤○辛卯以裁缺長甯縣民戶地畝徵收審
驗等事改設州同一仍隸永吉州管轄○壬辰以陳時夏爲內閣
學士由新州營田觀察使遷○癸巳命侍衛松福等各帶銀二千兩往文安
霸州等處撫恤○乙未以永定河隄工衝決命協辦吏部尙書事
碩琮前往會同李衛劉勣籌畫辦理○丙申減廣西土司貢馬折
價照四川例減四兩定爲八兩○命再撥庫銀三千兩撫恤良鄉○丁酉命直
隸山西熱河等處邊外地畝改徵本色○戊戌諭部院會議事件
聲明至橐衙門○壬寅 御試續到博學鴻詞於體仁閣授萬松

齡張漢爲翰林院檢討朱銓洪世澤爲翰林院庶吉士○癸卯諭
自古致治以養民爲本而養民之道必使興利防患水旱無虞方
能使蓋藏充裕緩急可資是以川澤陂塘溝渠隄岸凡有關於農
事豫籌畫於平時斯蓄洩得宜潦則有疏導之方旱則資灌溉之
利非可諉之天時豐歉之適然而以臨時賑恤爲可塞責也朕御
極以來宵旰憂勤惟小民之依是咨是詢前後諭旨諄復再三但
化導自在有司而督率則由大吏近日直省督撫惟甘肅巡撫德
沛到任後卽以興水利裕倉儲爲請署西安巡撫崔紀亦有勸民
鑿井灌田之奏尙能留心民食知本計之所當先其餘能盡心於
吏治官方命盜錢糧諸事者尙不乏人而於民生衣食本源未能
切實講求地方守令亦惟於刑名錢穀自顧考成至以愛養百姓
爲心留意於稼穡桑麻如古循吏所爲者益不可得卽如直隸今

年夏初少雨深以曠旱爲憂及連雨數日尙不甚大而永定河隨有漲溢之患決口至四十餘處低窪之地多被水淹雖因山水驟發然水性就下其經行之地自有定所設豫爲溝渠以洩之爲塘堰以蓄之自可以分殺水勢不至匯爲洪流衝突漫衍如此之甚是皆平日不能豫先籌畫所致也東南地方每有蛟患者之於古季夏伐蛟載在月令今土人留心者尙能豫知有蛟之處掘地得卵去之則不爲害且蛟行資水遇溪澗而其勢始大田疇雖不可移而廬舍塋厝尙可遷就高阜之地以避之是以未嘗不可先事豫防惟在實心體察耳該督撫有司務體朕痼瘼乃身之意刻刻以民生利賴爲先圖一切水旱事宜悉心體究應行修舉者卽行修舉或勸導百姓自爲修理如工程重大應動用帑項者卽行奏聞妥協辦理興利去害俾旱潦不侵倉箱有慶以副朕惠愛黎元

至意○諭天下親民之官莫如州縣州縣之事莫切於勤察民生而務教養之實政夫所謂知州知縣者欲其周知一州一縣之庶務悉心經理四境卽其一家精神必須貫注有事則在署辦理無事則巡歷鄉村所至之處詢民疾苦課民農桑宣布教化崇本抑末善良者加以獎勵頑梗者予以戒懲遇有爭角細事就地剖斷以省差拘守候之苦煙戶牌甲隨便抽查使不敢玩法容隱鄉愚無知則面加開導庶幾上下之情通達無阻而休戚相關親愛之誠油然而生而提撕易入如此從容歲月始可以收循良之實效不愧爲民父母之稱乃今之州縣有司止以簿書爲事平日安坐衙署除驗相人命因公踏勘外足迹不至鄉間以故鄉民非有事匍匐公庭目不覩官長之面耳不聞官長之訓無論窮簷疾苦未能周知卽四境情形亦茫然莫曉胥役約保等蒙蔽之弊因之以

起顧名思義親民之謂何而情誼睽隔如此也凡州縣所管地方大率不過百餘里最廣者二三百里周遭巡歷爲時亦不甚多卽事繁之處亦未必朝朝聽訟日日比櫨果能精勤勿怠斷不至於經理無暇遂置閭閻於膜外也至於農田之事尤爲養民之要務春耕秋斂之時各宜下鄉察其勤惰稽其豐歉儻有應先事圖維臨時酌辦者悉心計議申詳上司定議舉行但往來鄉村必須輕騎減從絲毫不擾里民方爲有益若失於覺察以致書吏鄉保及跟隨人役等借端生事擾累百姓則較之耽逸偷安端居不出者其過爲更大朕必加以嚴譴著各省督撫遵朕此旨董率有司實力奉行務使官民上下情意流通聯爲一體以副朕教養斯民之至意○諭四川民賴廷珍賴可年王茂榮圖財謀害汪九錫一案該部議稱例應不分首從皆斬立決等語但汪九錫並未身死賴

廷珍賴可年王茂榮俱從寬改爲應斬監候秋後處決朕思圖財害命原同強盜之例查盜案尙有分別不盡立決而謀財之案或以數人而抵一人之命於法未免稍重大凡圖財害命者若無起意爲首之人必不能行事今若將起意爲首者一人立置重典其餘改爲監候使天下人人知起意之罪不同於脅從之人難緩須臾之死不敢造謀糾約則此等兇惡之事無倡先之匪類未必不漸次減少其如何定例之處著九卿詳悉定議具奏尋議圖財殺人之案此等人犯實屬兇殘應將造意爲首並爲從加功者依律擬斬立決其爲從未加功者改擬斬監候秋後處決至圖財傷人未死之案雖被害幸而未死但已豫存致死之心於法實無可貸應將造意爲首者亦依律擬斬立決其爲從加功傷人較之造意有間改擬斬監候秋後處決若爲從未加功傷人則情有可原照

例減等發遣請增入律例冊一體遵行下部知之○轉程元章爲吏部左侍郎以崔紀爲吏部右侍郎仍署陝西巡撫○丁未諭朕臨御以來凡入旗部院及直省虧空銀兩施恩豁免已不下數千萬溯其虧空之源或係侵蝕或係那移侵蝕者以公家之帑金充己身之私橐其罪固無可逭而那移之項則由辦理不能妥協苟且遷就之所致亦屬罪所應得者是以當年我皇考世宗憲皇帝分別著追以示懲儆原出於不得已卽朕今日之加恩寬免亦出於不得已並非以伊等數十年之虧欠一旦豁免遂謂人人蒙澤而以爲快舉也朝廷體恤臣工詔綰授祿原以厚其身家長其子孫卽爲臣子者服勤宣力亦自應思世沐恩榮長叨覆露豈有以身犯法虧欠帑項累及子孫而倖逃國典轉相慶幸以爲得計者乎是朕心實不願於此等事加恩天下臣工亦不當於此等處

望恩也夫公爾忘私國爾忘家乃人臣事君之大義今縱不能屏棄身家之念亦當思所以保全身家爲長久之計若苟圖一時之利罔顧後害以致身敗名裂貽累後人則下愚之甚者及至虧空被劾身家已傾子孫並獲罪戾而後希冀豁免又何如謹身節用遵守法紀早自立於無過之地以長沐國家養育之恩乎况虧空國帑必須稽查縱能掩飾於一時不能不敗露於異日至敗露之後而得恩免乃朝廷格外之曠典尤非可以屢邀者內外臣工有應得之俸祿養廉於仰事俯畜亦足自給所當各自猛省嚴義利之辨審禍福之關毋得縱慾敗度自貽後悔至於題奏虧空案件動云家產盡絕夫所謂家產盡絕者必上無片瓦下無立錫飢不得食寒不得衣有不可終日之勢若今所謂家產盡絕之人衣食未常虧缺家口仍得支持不過無力完帑遂過甚其辭以邀恩免

而實非至於此極也夫國家享億萬年無疆之休惟冀大小臣工永沐恩膏於勿替若至於家產盡絕豈厚待臣工之意况本無實事而徒存此虛名又何爲者嗣後一切虧空案件仍照舊例辦理如有實在不能完納者但當云無力完帑出具保結不得用家產盡絕字樣著將此旨傳諭內外臣工知之○壬子增築江南山陽等五州縣隄工○癸丑直隸河道總督劉勳以疏防革職○以陳世倌爲倉場侍郎由左副都御史遷○丙辰諭蠲免錢糧所以紓民力而惠黎元或偏災偶見尤宜急加寬恤故周禮荒政以薄徵爲先乃不肖州縣一聞蠲免恩旨往往於部文未到之前差役四出晝夜催比追呼之擾更甚平時迨詔旨到日百姓已完納過半朝廷有賜復之恩而閭閻不得實被其澤甚至官吏分肥侵漁中飽情弊種種深可痛心我皇考世宗憲皇帝洞悉其弊雍正十一年八

月內蠲免甘肅地丁銀兩奉 旨將已完在官之項准抵明年正課此誠萬世之良規所當遵奉者嗣後凡有豁免俱以奉旨之日爲始其奉旨之後部文未到之前有已輸在官者准作次年正賦永著爲令如官吏蒙混隱匿卽照侵盜錢糧治罪

八月己未湖南巡撫高其倬奏擒獲城步等縣兇獠在事官弁賞卹有差○壬戌命巡漕御史四員分駐淮安濟甯天津通州○癸亥給遞解人犯口糧○甲子諭數年以來各省督撫往往奏稱某道某府不勝外任請調京改補朕欲驗其人才常允所請令送部引見酌量補用今馬宏琦奏稱黜陟本有恆規內外無容偏重微特褻廢者不宜復占曹司卽平常者亦不應數行改補等語朕思內外原屬並重部曹亦爲要職督撫等於所屬道府內有不能勝繁劇之任者卽當奏請調簡若並不能勝事簡之任卽應勒令休

致何得輕視京職而爲苟且姑容之計以便其私耶人君日理萬幾所降諭旨豈能必其盡當司言責者果能據理直陳於政務自有裨益殊非託之空言而無濟於實用者可比馬宏琦所奏可嘉著交部議敘並將伊原奏發各督撫知之○乙丑命河南永城等十九州縣改徵折色銀兩○甲戌命大學士鄂爾泰詳勘直隸河道水利○丙子以顧琮署直隸河道總督○辛巳以趙之坦爲左副都御史由通政使遷○壬午復設貴州威甯鎮總兵官○築浙江魚鱗大石海塘○貴州總督張廣泗奏遵旨籌畫苗疆業將叛苗絕戶田產安設屯軍並查餘苗見種之田凡攙入絕田內者令指明坵段撥歸屯軍另查閒田給還苗人其有應遷移者均飭令承辦官量給銀米以資其費前計算絕田約可安屯軍五六千戶見據各具報清江可安屯軍二千六百餘戶古州三保可安一千一百

餘戶入寨可安八百餘戶丹江可安九百餘戶其餘尚有古州山苗一帶暨臺拱凱里黃平施秉勝秉清平等處約計可安五六千戶此皆清出叛苗絕產分布安屯其應設屯堡一百餘處亦皆形勢扼要若去營汛稍遠不宜安屯者皆撥還苗人並賞無業窮苗並未嘗如尙書顧琮所奏於深山邃谷招募屯田盡奪生苗衣食之地也見細察苗人無不悔過自新及時耕作前經奏請添兵三千餘名各查出田畝又可安屯軍一萬餘名分布險要於經久之計已屬萬全得旨苗疆經此一番料理自必有數十年之安靜無事然經久之計不可不圖而用人之際尤所當慎不然法雖良而無人經理所謂徒法不能以自行也

九月戊子諭御史舒赫德奏請將各省稅務歸併旗員管理此奏甚無識見彼意以爲旗員生計艱難若管理稅務則可沾餘潤以

資養贍不知國家設立關隘原以查察奸宄利益商民並非爲收稅之員身家之計也若以旗員貧乏而差遣之是導之使貪矣朕日以砥礪廉隅訓勉臣工尙恐其不能遵奉而可以謀利之見爲之導乎況當日旗員管理關務者亦指不勝屈惟視此以爲利藪故貪黷之風侵蝕之弊不一而足因而身罹罪譴籍其家產累及子孫是今日旗員之貧乏未必不由於當年收稅之所致也豈可使之復蹈前轍且各省委辦稅務率多道府等官並無滿漢之別如滿洲有任道府廉潔自愛者何嘗不可派委而必定以爲例乎總之爲上者施逮下之仁惟有勵以忠勤示以節儉固其根本之圖爲下者皆當早作夜思宣力供職以永受國家惠養之恩方可謂之計長久蓋厚其生計之道不可不思而長貪風以爲惠下則利未見其利而且貽害於後日此理甚明非所以教旗員之道亦

並非所以愛旗員之心也朕御極之初圖理琛卽爲此奏總理事務王大臣亦以爲可行朕並未俞允後此陳奏者紛紛朕槩不准行亦未交議今舒赫德又條奏及此可將朕旨宣布於外使咸知朕意毋得以斷不可行之事再行妄奏○給順天府府丞以下官養廉○辛卯以大挑運河淮安等府屬漕糧准改徵折色○給江蘇蘇州等衛所養廉○癸巳命河南山東河兵椿手准食戰糧○乙未諭邵基簡任江蘇巡撫正資料理昨聞患病沉重特遣御醫馳驛前往調治冀其痊可今聞溘逝深爲憫惻著該督委員經紀其喪送回本籍應得卹典該部察例具奏尋子祭葬○調楊永斌爲江蘇巡撫以張楷署湖北巡撫由禮部侍郎署○丙申除雲南陸涼州旱馬廠瘠地額賦減水馬廠魚課○諭至聖先師孔子天縱聖神師表萬世尊崇之典至我朝爲極盛皇考世宗憲皇帝尊師

重道禮敬尤隆闕里 文廟 特命易蓋黃瓦鴻儀炳煥超越前
模朕祗紹 先猷璣牆念切思國子監爲首善觀瞻之地辟靡規
制宜加崇飾 大成門 大成殿著用黃瓦 崇聖祠著用綠瓦
以昭展敬至意○丁酉頒 聖祖仁皇帝御製文集 世宗憲皇
帝硃批上諭 御製樂善堂集於官學○庚子除江西豐城縣每
年增修江隄捐項○癸卯實授鍾保工部右侍郎○甲辰諭國家
設立科道官員專司建言之責必心本無私又能通達治理乃爲
無忝厥職若識見雖未明通而居心樸誠則其言雖愚戇而尙無
害於事理朕亦鑒其忱悃而優容之惟胸懷愛憎之私借章奏以
展其巧計者則有玷臺垣國法不可輕恕卽如並未深悉地方民
情而奏稱某地某事甚善而承辦之人已暗受推薦奏稱某地某
事不善而承辦之人已暗被中傷是其敷陳之時並非據實秉公

匡勦政務而言在於此意注於彼其居心尙可問乎看來近日科道中此等氣習頗不能免亦難逃朕之洞察今年毛城鋪一案卽其明驗也朕所以已敕部糾察而復寬恕者特以伊等職在言官過爲初次然寬大之恩不可屢邀而獻納之實所當躬踐至如前日御門御史謝濟世露章奏參九卿刑部秋審不公其意本於據誠尙近於愚戇一流而非出於愛憎之私者此事已交總理事務王大臣查奏卽使所奏非當朕亦取其戇直斷不以所言未協輒加斥責也其餘科道官員當捫心自問如稍有愛憎之私未泯於中者各宜猛省悛改毋蹈罪戾○召史貽直回部辦事以德沛爲湖廣總督元展成爲甘肅巡撫由山西按察使遷○丙午黃士傑卒以馮元方爲廣西按察使由廣東廣南韶連道遷○丁未降薩哈諒爲山西按察使調刁承祖爲廣東布政使以阿蘭泰爲江西布政使由內閣侍讀學士遷

○召鄭禪寶來京以黃叔琳爲山東布政使白映棠爲山東按察

使

由陝西漢興道遷

○戊申命直隸籌補倉糧○以嚴瑞龍爲湖南按察

使

由鴻臚寺少卿遷

○己酉命江蘇揚州等六府州屬夏麥改徵米石○

庚戌定滿洲郎中保送道員例○辛亥命州縣以下官養廉就近坐支○癸丑免雲南安甯州乾隆元年夏稅○除甘肅河西等三府州縣衛馬糧

閏九月丙辰朔諭川省耗羨銀兩向因公用不敷每兩完銀二錢五分朕御極以來加惠閭閻減去一錢止存一五之數無非欲使民力寬餘受國家休養之澤也今據碩色奏稱該省相沿陋規於火耗稅羨外每銀百兩提解銀六錢名爲餘平以充各衙門雜事之用等語聞之不勝駭異火耗之報官原以杜貪官污吏之風若耗外仍聽其提解此非小民又添一交納之項乎一項如此別項

可知一省如此他省可知朕思此等浮多之費雖爲數無幾而取之商民層層剝削其數必不止此難免地方之擾累著巡撫碩色永行革除以杜官吏借端需索之弊儻公用內有必不可少之項著於存公耗羨內支給報銷別省有如此者著各該督撫查明具奏○除江南高郵等五州縣河隄屋租嗣後禁止增建○戊午濬直隸涑水縣拒馬河○庚申諭刑部奏江西巡撫岳濬參奏原任巡撫俞兆岳缺少九贛二關盈餘銀兩一案應令該撫按款審明分別定擬朕因各省司權官吏於正稅之外巧立名色多方需索有累商民以是屢降諭旨各令裁減爲恤商之計但恐不肖之徒外託減稅之名陰行侵蝕之事徒飽私囊而恩惠不得下逮又不可不嚴加查覈以清弊竇原非爲錢糧起見也俞兆岳辦理關務未久而缺額至十萬餘兩較之他省爲數甚多朕恐其中不無情

弊特令岳濬詳細稽查乃伊遲至半年之久而奏稱無著者僅有二萬五千餘兩又皆不得確據是俞兆岳於稅務無甚情弊而岳濬誤會朕意參請究追豈朕經理關權之本意乎俞兆岳著暫行保釋其中有應令該撫查察之處俟審明具題到日另行定議○乙丑定八旗武職年老休致酌給全俸半俸例○命福建酌賞浙江教習蠶戶養贍田畝○丙寅總理事務王大臣九卿會議禁止燒鍋一事據河北五省督撫各抒所見陳奏內有請仍照舊例查禁者有請宜寬於豐年而嚴於儉歲者有請不必禁止者有請永行查禁者有請嚴禁躉麴興販者臣等公同詳議因地制宜者國法之備因時立法者王政之經王制有曰修其教不易其俗齊其政不易其宜凡謂居民服食器用之不能畫一也燒鍋一事各省之情形不同所以各省督撫之陳奏亦不能畫一應令各於本省

因時制宜實力奉行以觀成效至躡麴一項係燒酒盛行之源眾論僉同自當嚴禁惟所請治罪之處互有異同宜改歸畫一請將躡麴販運者定以杖一百枷號兩箇月以示懲儆從之○丁卯諭王大臣等貴州總督張廣泗奏內地新疆逆苗絕產請酌量安插漢民領種彼時朕降諭旨以苗性反覆靡常若新疆招集漢民耕種萬一苗人滋事蠢動是內地之民人因耕種苗地而受其荼毒此必不可行者不得已而思及屯軍乃指相近內地之處而言隨經王大臣議交張廣泗再行詳議具奏復據張廣泗奏稱逆苗絕戶叛產俱令自行首舉苗人等爭先首報一無抗違且歡忻踊躍毫無疑忌但此等叛產安設屯軍以資分布防維必須接聯營汛以及糧運商旅經由水陸通衢處所而叛苗絕產與餘苗見種田畝多有攙雜應將見戶之田凡有攙入絕田內者令其指明若干

坵段歸併屯內卽以絕田之在旁列不宜安屯之處令該苗自行相度按數撥還甯使有餘毋令不足等語又經王大臣議照所請辦理在案今尹繼善來京陛見朕詢及苗疆事務伊一一陳奏大約以逆苗產業分布屯軍之舉尙未妥協朕再四思維數年以來經理苗疆原期甯輯地方化導頑梗並未利其一絲一粟是以苗地應輸之正供朕皆仰體 皇考聖心永行革除不使有輸將之累豈肯收其田畝以給內地之民人乎從前屯田之意原因該督等奏係無主之絕產故有此議今看來此等苗田未盡係無主之產或經理之人以爲逆苗罪在當誅今旣宥其身命卽收其田業亦法所宜然故如此辦理殊不知苗眾自有之業一旦歸官伊等目前雖惕於兵威勉強遵奉而非出於本心之願安能保其久遠甯帖耶至於撥換之舉在田地有肥瘠之不同而畝數又有多寡

之各異其能銖兩悉合饜服其心使苗眾無絲毫較論之念乎總之頑苗叛逆之罪本屬重大國家旣施寬大之恩待以不死予以安全而此區區之產業反必欲收之於官則輕重失宜大非皇考與朕經理苗疆之本意矣料此時張廣泗正在辦理屯軍之事可速將朕旨馳寄令其卽行停止查辦之官應撤出者卽行撤出其絕產實有幾何如何布置之處必熟籌萬安請旨施行不可固執前見張廣泗向有郡縣其地之請今屯軍如此經營伊意中尙不能不瞻顧前說也又諭古州等處苗人等爾等苗眾向來未歸王化素性兇頑每多自相仇殺視人命如草菅且時時出擾內地戕害居民劫奪行旅爲黔楚數省之患久矣後據該省督撫奏稱爾等有向化之忱是以我皇考世宗憲皇帝天地爲心不忍棄置幷幪之外諭令督撫經理收入版圖使得均霑實惠共享昇平

之福乃爾等性多反覆又復反叛干犯城池荼毒百姓繩以國法
罪在必誅朕又念叛亂必有爲首之人特諭經略等分別勦撫殲
厥渠魁脅從罔治俾爾等得保首領全其家室又念從前所定糧
額雖至輕微而官吏徵收不無擾累特命將維正之供盡行革除
又以苗地風俗與內地百姓迥別諭令苗眾一切自相爭訟之事
俱照苗例完結不治以官法則所以加恩爾等者可謂至矣前者
內外大臣等請將苗地收爲郡縣朕不允行今督臣又奏稱苗逆
絕戶叛產令自行首出分給屯軍其中叛苗絕產與餘苗見種田
畝彼此多有攙雜應將見戶之田攙入絕田內者查明坵段歸併
屯田卽以絕田之在旁列者按數撥還眾苗無不歡欣樂從等語
朕思此等田畝未必盡係無主之產不忍以爾等自有之業強令
歸官且撥還之舉恐有以瘠易肥以少易多之弊况爾等叛逆之

罪最爲重大國家旣施浩蕩之恩槩行寬宥予以安全又豈肯將此區區之田產收之於官致有虧爾等之故業乎用是特頒諭旨令經理大臣停止屯軍之事另行熟籌萬安以乂安爾等苗眾爾等受此重恩當各思悔過遷善安分守法永爲天朝良民以長享太平之福澤爾等具有人心其敬聽朕旨無負諄諄訓諭至意○以尹繼善爲刑部尙書調慶復爲雲南總督以那蘇圖爲兩江總督○戊辰召溫而遜來京以范琛爲河南布政使由江南應鳳道遷○已巳諭外省有荒缺銀兩之處向例在於知府以下等官俸工內扣除抵補朕念佐雜微員力量單薄不應在扣除之內已於乾隆元年三月內降旨諭令在督撫司道大員及知府正印官俸工內酌量均攤以抵所缺之數今思官有尊卑役無大小微員俸工旣經免其攤扣其餘各衙門人役皆當差效力之人額支工食數兩藉

以養贍其家若因荒缺扣除則伊等餬口無資情有可憫查此項共計銀一十二萬餘兩著於乾隆戊午年爲始各省大小衙門人役工食俱准於地丁項下照額定之數全行支給免其扣荒使執役之人均沾恩澤○命培築直隸清河隄岸○庚午諭聞今年夏秋間有小琉球中山國裝載粟米棉花船二隻遭值颶風斷桅折柁颶至浙江定海象山地方隨經大學士嵇曾筠等查明人數資給衣糧將所存貨物一一交還其船隻器具修整完固咨赴閩省附伴歸國朕思沿海地方常有外國船隻遭風颶至境內者朕胞與爲懷內外並無歧視外邦民人旣到中華豈可令一夫之失所嗣後如有似此被風颶泊之人船著該督撫督率有司加意撫恤動用存公銀兩賞給衣糧修理舟楫並將貨物查還遣歸本國以示朕懷柔遠人之至意將此永著爲例○壬申除江西袁州饒州

二府雜稅減南昌等三十二縣茶課○己卯諭朕前因各省軍屯額糧過重密諭各省督撫確查今據尹繼善奏稱滇省軍丁一項從前未曾攤入地畝原議俟查有欺隱軍屯田地陸續抵補每丁自二錢八分至六錢二分不等共應納銀一萬五千三百八十兩內除自雍正四年至十一年抵去銀三千餘兩外尙有應徵丁銀一萬二千二百七十餘兩歷年惟按冊載老丁名字徵收或已無寸土而追比無休或已絕後嗣而波及同伍等語滇省軍丁一項從前既未曾攤入地畝而見在完納丁銀之人又係無田之人邊地屯民未免輸納維艱深可憫恤著將應徵軍丁銀一萬二千二百七十餘兩自乾隆三年爲始槩予豁免俾無業屯民永釋苦累○命修永定河隄壩○築江南碭山縣毛城鋪減水壩○壬午賜哈攀龍等一百七人武進士及第出身有差○甲申諭從前雲南

布政使陳宏謀摺奏廣西借墾報折一事與金鉉所奏互異朕已諭令督臣鄂彌達撫臣楊超曾秉公查究毋得徇徇目今尙未覆奏而陳宏謀又復具摺曉曉瀆陳陳宏謀身爲滇省藩司此並非伊任內之事其始出之奏猶云據已知而直陳以備採擇旣降旨與他人查議則伊事已畢惟有靜候無再言之理乃伊不待督撫諸臣議覆而又爲是瀆奏竟儼然似以爲不如伊所奏不止者是誠何心且伊爲粵人卽所言盡是而從之猶啟鄉紳挾制朝廷之漸况未必盡實乎殊屬冒昧之至著交部嚴加議處以爲將來之

戒

尋降補天津道

冬十月乙酉朔諭策楞訥親因伊母之喪奏請守制二十七月情詞懇切凡滿洲大臣官員遇有親喪於百日之後卽入署辦事者以旗員人少若皆守制三年則公事必致有誤亦出於勢之不得

已也滿洲服制以百日爲期今年朕因木和林之奏特降諭旨令滿洲大臣於二十七月之內不與朝會宴集之事而持服一節尙在交議未定但思滿洲官員及世職等俱藉俸祿以贍其家口如皆令離任開缺無以爲養贍之資其事亦屬難行雖人子之於親喪盡哀盡禮以答劬勞之德乃出於天性至情初不計及俸薪而朕養育旗人之意則不得不爲之籌畫萬全今訥親之奏若抑令止循舊制人子之心必有展轉難安者其應作何斟酌分別定制俾公事私情俱得兩盡之處著大學士會同九卿妥議具奏武職自副將以下向無丁憂之例今應如何酌量定制一併議奏尋議嗣後文武旗員遇有親喪百日後仍令入署辦事並照常支俸至入朝進署及一切公所准用素服惟進至御前應用吉服時則仍從吉服凡朝會祭祀謹遵本年諭旨免其執事其升遷之處除奉

特旨升用外暫停開列至服滿後較俸之時仍准算俸其八旗生
監舉人進士二十七月內暫停考試銓選再武職官員定例副將
以上准其丁憂參將以下不准丁憂亦不准給假葬親其果係獨
子家無次丁者查所管防守營汛尙非緊要許該督撫提鎮奏明
給假近者不得過六箇月遠者不得過十箇月蓋緣武職防守汛
地緊要若一槩丁憂離任恐更易生手於武備汛防大有不便
是以不准丁憂定例遵行已久毋庸再議惟給假治喪之例非獨子
槩不准行情殊可憫請嗣後參將以下等官除軍機調遣仍不准
給假外其餘各營武職自參將至千把無論獨子與非獨子凡遇
親喪俱應給假其父母歿在任所者准其扶柩歸葬在籍者准其
回籍奔喪近者不得過六箇月遠者不得過十箇月該督撫將給
假日期報部事畢依限回營素服辦事二十七月之內遇朝會祭

祀齋集一切應穿吉服之處俱免隨班行走未滿服前毋庸升轉至服滿後仍准算俸從之○復元儒吳澄從祀 文廟○丁亥諭朕聞浙江嚴州府桐廬縣屬有官抄秋租二項額徵條銀較之民產科則多至三五倍不等前代相治事隔久遠不知起於何時而此二項田土多屬瘠薄又因賦重輸納維艱每至催徵逋逃相繼甚可憫念查此二項原徵銀七百九十九兩若依民產科則共應減銀五百八十一兩零著從戊午年爲始減去浮多之數照民產一例徵收俾小民均沾實惠○戊子 上以馬蘭峪 陵寢工竣躬親展謁啟鑾○己丑命山東濟陽等十六州縣兩次被災地方改徵折色○辛卯 上詣 昭西陵 孝陵 孝東陵 景陵行禮○壬辰祭 景陵回鑾○甲午諭據孫國璽石麟等奏晉省被災五州縣請銀米兼賑隨經部駁令其撥動鄰縣穀石分別散

給如不得已而銀米兼賑令該撫酌定價值報部已降旨允行朕思積貯之設所以裕民食也當荒歉之歲地方米穀必致缺乏發粟散賑既可令無食貧民藉以餬口而奸商之囤積者亦不得借以居奇此救荒之常理也且米石出入眾目共覩上司亦易於稽查若以銀分給殊非周濟貧民之本義而貪官猾吏浮冒侵蝕更弊端百出矣但恐晉省倉糧平日原未必充裕而今年被災之處或尙不止五州縣儻或倉儲無幾輓運需時則災民之迫不及待者不得卽沾升斗又非朕軫念窮民之至意用是再頒諭旨著孫國璽石麟等詳查地方實在情形如果鄰邑米多易運卽照部議撥給若糧少運難著暫行銀米兼賑仍酌定價值報部一面辦理一面奏聞總在多方稽查務使官吏無所容奸窮黎均沾實惠○丙申除福建南平縣浮冒丁銀○實授崔紀陝西巡撫尹會一河

南巡撫張楷湖北巡撫許容山西布政使楊錫紱廣西布政使戴

永椿江蘇按察使張坦麟安慶按察使魏定國陝西按察使凌燾

江西按察使○丁酉免雲南新開夷疆借給墾荒銀兩○以雙喜

爲盛京戶部侍郎由內閣學士遷○甲辰命水師毋輕調陸路○乙巳減

江西南昌等七州縣浮糧○調趙殿最爲吏部右侍郎由戶部左調○庚

戌命清理馬政○癸丑湖北巡撫張楷奏請 聖訓得旨覽廉之

一字何庸訓汝但汝初到任正當留心地方大務俾綱舉目張庶

政咸修方足以稱此任而首爲是沾沾之論則汝自謂硜執實自

知之言所當擴充識見以爲封疆大器又朕近觀 皇考硃批頗

以汝爲沾名釣譽之流汝其服膺 聖訓時時省過自改可也○

貴州總督張廣泗再奏苗疆安頓情形得旨據卿前摺奏陳已交

王大臣議行矣此旨或改行頒發或無庸頒發之處卿於彼案議

覆歸結可也卿既熟悉苗情又屢經籌度且以身家相保朕自然聽卿料理至陸見之時尙早以苗疆甫定須卿彈壓卿其候旨可也

十一月丁巳禮部奏朝鮮國王李昖請封世子李愼年未及歲與例不符應否准其冊封得旨該國王既稱遲暮之年伊子李愼知

識漸長輿情所在願名位早定情詞懇切著照所請行○己未撥

通倉米六萬石備近京東北州縣冬賑○轉呂耀曾爲戶部左侍

郎調王鈞爲戶部右侍郎以陳惠華爲刑部右侍郎由詹事遷○庚申

減免江南蘇州松江二府浮糧免額徵銀二十萬兩○壬戌命裁八旗官米

局嚴禁鋪戶囤積○命額駙策凌護送準噶爾夷使來京以海蘭

署理副將軍○丁卯以吳拜爲內閣學士由詹事遷○戊辰 上以三

年服闋恭謁 泰陵啓鑾○辛未 上謁 泰陵○命增熱河駐

防兵丁改總管爲副都統○免江南銅山碭山二縣逋賦○壬申祭告 泰陵 上釋服回鑾○乙亥 上還宮○庚辰命增修七政時憲書○莊親王允祿等辭免總理事務○免山西興縣等四州縣旱災丁銀○辛巳命大學士鄂爾泰張廷玉尙書訥親海望侍郎納延泰班第爲軍機大臣○除山東商河縣鹹鹵荒地徵銀並雍正十三年乾隆元年逋賦○壬午諭翰林坊缺仍帶俸深編修檢討二十員引見○諭大學士鄂爾泰奏辭總理兵部事務大學士張廷玉奏辭兼管吏部戶部事務情詞懇切至於再三卽數年來亦屢有人陳奏大學士不應兼管部務者此乃就常例而論不知國家委用大臣隨時變通止期有裨政治難以拘執成規亦多有與例不符而出於不得已者諸臣未能盡知也 皇考當日命鄂爾泰張廷玉兼理部務迄今多年朕御極以來亦知兼攝爲

難二臣亦屢以爲請而其中實有難於更易之情勢蓋兵部尙書
訥親雖年力精壯實心任事而莅任未久諸事尙未諳習吏部職
總銓衡關繫甚鉅非謹慎練達者未易勝任此二臣者實爲朕心
之所倚賴今乃辭解部務將來之繼二臣辦理者其事事妥協與
否朕尙未能豫知豈肯遽從所請在二臣受國家厚恩當視公事
如己事亦不當以任事簡少易於盡職而忽視部務往復瀆陳也
俟數年之後朕酌量再降諭旨鄂爾泰仍著兼管兵部張廷玉兼
管兩部事務實多難於兼顧准其解退戶部仍兼管吏部其他兼
管部務之大學士邁柱徐本不必兼管工部刑部○癸未諭朕御
門聽政之時翰林院修撰編檢與科道一同侍班翰林班次在科
道之上科道懸帶數珠而翰林未有定制朕思侍從之臣理應畫
一嗣後修撰編檢亦著一體懸帶數珠以肅朝儀○諭劉元燮奏

辭廣西蒼梧道請仍留御史之任查劉元燮於八月內奉旨外轉旋於閏九月內吏部引見道員劉元燮卽隨班入見彼時並未奏請留京今閏五月有餘而忽爲此奏明係不願前往廣西捏辭規避且伊又稱吏部應夾單請旨不應照康熙年閒之例將伊入於月選等語不知缺有繁簡之不同有應請旨補授者有應歸於月選者從前閏九月內有請旨缺出吏部已將劉元燮夾單引見一次朕未降旨補用是以仍在候補之列今遇有月選之道缺吏部照例銓選此一定之理並無錯誤劉元燮何得挾其私心支離瀆奏將前後情節藏匿希圖蒙混以惑朕聽不自知其矛盾也劉元燮若果欲留京效力何不奏請於奉旨外轉之時又何不奏請於初次引見道員之日及至籤掣廣西之後忽爲此奏其居心尙可問乎且劉元燮摺內引周昌汲黯自比彼與古人誠僞邪正相去

天淵乃不自知分量而公然引以自況見之章奏其奸邪無恥亦已甚矣又伊今年六月閒因外閒偶有謠傳李紱張坦麟除官一節曾經奏聞朕降旨嘉獎以鼓勵言官究竟亦極平常之事其餘伊所條奏則皆摭拾陳言苟且塞責並無有裨政治可見諸施行者今何得大言不慚輒以敢言自詡試思伊所敷陳有一裨於政治切於朕躬可以萬一彷彿周昌汲黯者耶至於月選道府州縣等官由吏部過堂掣籤九卿在午門公同驗看此乃國家定制無人違而劉元燮以爲凌辱豈有九卿同在班聯而目擊書吏筆帖式凌辱道員之理此又不問而知其爲欺罔也似此巧詐狂妄挾私規避之人竟敢以直言自居是實有玷於周昌汲黯者也朕若再加姑容則將來言路必至於不可問而假公濟私朋黨之風因是而起矣不得不嚴加處分以示懲儆劉元燮著革職發往廣

西以佐貳等官令其效力贖罪若再有規避不實心盡力處卽著該督撫題參從重治罪○除山東德州蓬萊等州衛雜稅○增熱河副將以下員弁○湖南巡撫高其倬奏報收成分數得旨語云湖南熟天下足朕惟有額手稱慶耳

十二月甲申朔補熙丁憂以查克丹爲漕運總督

由工部
尚書遷

○實授

來保工部尚書○免直隸大興等七州縣八旗餘絕地畝乾隆元年額賦十分之三○丙戌改內閣典籍爲七品官○丁亥上御太和殿冊立嫡妃富察氏爲皇后封高佳氏爲貴妃那拉氏爲嫺妃蘇佳氏爲純妃金佳氏爲嘉嬪○庚寅命江西瀘溪縣漕糧改徵折色○壬辰命嗣後御殿大學士於殿內賜茶○甲午以冊立皇后禮成加上皇太后徽號曰崇慶慈宣皇太后○除江蘇鹽城阜甯二縣濱河地糧○丁酉諭各省常平

倉原爲濟民而設每年青黃不接之時存七糶三以給民食秋成之後照數買補出陳易新不致紅朽以備歉歲賑恤之用法至善也但有司奉行不善其弊遂有不可勝言者當其出糶之時惟附近居民就近赴買而鄉民則往返守候不能徧及且城中衿戶役戶牙戶囤戶與倉書聲氣相通捏名報買而州縣之內丁隨役亦乘機暗竊通同盜買雖倉額有虧總期秋熟買補還倉時於斗秤溢額浮收填補遮蓋此平糶時之弊也至買補之際往往擇縣中富戶發給銀兩令其交穀有照時價短發十之一二者有銀色低潮者或令自運還倉腳價無出又或用斗則以大易小用秤則以重易輕且交倉折耗盤倉供應之費皆出之小民此富民受累也乃更有照糧派買之弊每處派一買頭總斂各戶照數交倉此等窮黎二月新絲五月新穀尙然不敷豈能堪此擾累朕思穀貴則

出糶穀賤則買補自然之理然天時豐歉靡常而價值低昂難定
儻或買補之時不能無賠累之苦則官吏不能不問之間閭而不
肖者更欲藉此獲利則其害益不可問矣其中弊端種種朕知之
甚悉卽臣工參奏者亦甚多但再三思維若明降諭旨又恐啓奸
民阻撓公事之漸可密寄各省督撫將如何籌畫辦理使官吏無
累而蓋藏常足之處悉心定議具奏○特准八旗另戶兵丁考試
繙譯一次○命官員准丁本生父母憂一年○追封 皇后之父
李榮保爲一等公以其子傅文承襲一等侯○戊戌諭軍機大臣
等前據陝西巡撫崔紀奏稱行令民間鑿井以爲灌田之用此亦
有益於稼穡之事朕已允行今聞崔紀辦理未善自隴州至潼關
一帶井面圍圓止合抱有餘深者不過二三丈淺者僅有丈餘卽
有深處又多係阻滯之士甫能及泉旋即壅塞潼關一帶如此則

他處可知秦中地勢本高積土深厚今開挖若此儻遇天時亢旱
禾苗未見焦枯而各井已先涸矣且以十畝之地勒開三井所起
土塊卽堆積田中是今歲方萌之秋麥已損傷一二又嚴限四十
日告成小民奔走不遑甚苦竭蹶凡民開井砌甃者非數十金
不可卽土井亦須數金今輒井發價七兩土井發價三兩實不敷
用民有怨言是崔紀欲求速效草率從事而不知其無益有損也
朕所聞如此可速傳諭崔紀令其悉心體察詳加籌畫務收鑿井
之益而去閭閻之擾儻有地勢不能開挖者亦卽聽從民便毋拂
輿情○禮部侍郎方苞奏懇解部職專力修書允之命仍食原俸
在書館行走○己亥命江南贛榆沐陽二縣漕糧改徵折色○庚
子諭 先師孔子聖集大成教垂萬世我 皇祖聖祖仁皇帝
皇考世宗憲皇帝親詣辟雍登堂釋奠儒臣進講經書諸生圍橋

觀聽雍雍濟濟典至盛也朕祇承丕緒嚮慕心殷國學 文廟特

命易蓋黃瓦以展崇敬俟工程告竣之日朕躬詣釋奠用昭重道

隆師作人造士之意○議敘總理事務王大臣莊親王允祿果親

王允禮各賞給一鎮國公平郡王福彭賞給奉國將軍大學士鄂

爾泰張廷玉各賞給一騎都尉大學士徐本尙書訥親海望各賞

給一雲騎尉世職○追復誠郡王允祉原封諡曰隱○追賜訥親

曾祖額亦都巴圖魯雲騎尉○壬寅以莊親王姪甯和襲封鎮國

公平郡王弟福靖襲封奉國將軍○大學士邁柱以病免○以吳

家驥爲禮部右侍郎

由內閣學士遷

○癸卯諭大學士張廷玉在內廷官

力多年輔弼贊襄勤勞茂著朕之視大學士鄂爾泰張廷玉一切

恩眷均屬一體今大學士鄂爾泰因賞給騎都尉已由一等子照

例歸併授爲三等伯張廷玉亦著加恩由三等子從優授爲三等

伯仍著伊子張若謨承襲○乙巳諭朕聞雲南昆明縣有老丁田地一項原係督撫兩標牧放營馬之區坐落省會昆海之濱本屬草澤嗣因沙壅淤成可墾之地節年以來定爲額收租米一千五百六十八石除完納稅糧條編並給發老丁口糧兵需米九百二十三石外尙餘米六百四十五石從前題報歸公遵行在案但此額收數目乃照豐收之年科定者而地處海濱土壤磽瘠若遇水大歉收之時則小民完納甚艱可爲軫念除老丁米石並糧條仍應照舊完納外其歸公米六百四十五石著該督撫查明永行豁免俾租額減輕民力寬裕卽從乾隆二年爲始○辛亥諭閩省丁銀勻入地畝已歷多年上年朕查出通省缺額田地五萬四千餘畝已降旨將糧銀豁除以紓民力但所勻丁銀未曾裁免仍屬小民之累著將應納丁銀九百六十一兩悉行免徵永著爲例又聞

延建邵三府有運解省城之糧米二萬四千石於耗米之外又徵運費每石一錢一二分至五六分不等交官之數若此其官吏需索之費正恐繁多小民輸將匪易著將此項永遠免徵所有運費三千兩卽於存公銀內支給以除閭閻之擾○是歲朝鮮琉球安南南掌來貢

東華續錄

乾隆七

臣王先謙敬編

臣周瀚蕃恭校

乾隆三年戊午春正月乙卯命福敏爲武英殿大學士兼工部尙書以馬爾泰爲左都御史

由兵部左侍郎遷

○戊午諭從前宗室王公等

嫁娶候旨指配者居多凡人嫁娶理應及時今宗室蕃衍若不分別遠近一槩候旨指配不無逾時久曠之慮朕意世系近者若年已長成婚姻結定令其奏聞若尙未結定令其請旨世系遠者當各聽其便其如何分別遠近定例之處著宗人府王等詳議具奏尋議 皇上伯叔輩王貝勒等子女兄弟輩王等子女至十五歲請旨其餘宗室子女特旨指婚者令候旨行餘酌量及時婚嫁應得品級該部照例奏給從之○辛酉祈穀於上帝恭奉世宗

憲皇帝配享○諭昔年各省解京餉銀有隨平陋規一項雍正元年蒙 皇考諭令停止嗣因清查部庫約計虧空銀二百五十餘萬兩事歷多年難於究問經怡賢親王以各色浮費旣已禁革奏請將京餉平餘陸續彌補以重國帑每餉銀一千兩收平餘二十五兩較之從前陋規雜費減省已多至雍正八年虧空補足欽奉 皇考諭旨嗣後解部平餘銀兩著照從前之數減去一半此項原出於錢糧耗羨卽留於本省以備地方公事之用欽遵在案是以來解部之平餘已較原數裁減一半矣朕思平餘卽係耗羨並非別有加徵解交部庫與存貯藩庫均爲國家公事之需但目前尙有平餘解部之名恐外省官吏或有借端需索者亦未可定著從乾隆三年爲始將減半平餘銀兩一槩停其解部卽存貯本省司庫遇有地方荒歉及裨益民生之要務確應賑恤辦理者卽

將此項奏明動用報部查覈此項既出民力輸將仍令一絲一粟均濟百姓之緩急朕何取焉若該省大小官員有奉行不善使百姓不沾實惠者朕惟於該督撫是問○癸亥諭朕惟四子六經乃羣聖傳心之要典帝王馭世之鴻模君天下者將欲以優入聖域茂登上理舍是無由我 皇祖聖祖仁皇帝 皇考世宗憲皇帝時御講筵精研至道 聖德光被比隆唐虞朕夙承 庭訓典學維殷御極以來勤思治要已命翰林科道諸臣繕進經史格言正論無日不陳於前特以亮陰之中經筵未御茲旣卽吉亟宜舉行所有典禮該部其諏日具儀以聞○諭閩省丁銀勻入地畝完納數年以來朕留心體察如甯洋壽甯南平等處地少丁眾小民難以輸將已降旨減輕以紓民力又如通省缺額田地旣將糧銀豁除則丁銀亦應寬免復降旨令該督撫查辦無非欲薄賦輕徭去

閭閻之擾累也今聞各州縣丁銀俱已適中惟漳州府之平和縣汀州府之清流縣延平府之永安縣尚有田少丁多之苦每田糧一兩徵丁銀四五錢不等較之別邑多至加倍有餘所當酌量變通俾此三邑一體沾恩著該督撫斟酌本地情形當如何裁減便民之處悉心定議具奏○甲子上幸圓明園奉 皇太后居暢春園凡慶節恭迎 皇太后御長春仙館以爲例○乙丑諭都城西郊地境爽塏水泉清潔於頤養爲宜昔年 皇祖 皇考皆於此地建立別苑隨時臨幸而辦理政務與宮中無異也朕孝養 皇太后應有溫清適宜之所是以奉 皇太后駐蹕於此不忍重勞民力另築園囿朕卽在圓明園而敬葺 皇祖所居之暢春園以爲 皇太后高年頤養之地一切悉仍舊制畧爲修繕無所增加伏思我 皇考旰食宵衣勵精圖治親書勤政扁額懸諸殿楹

朕瞻仰思慕時時做惕不敢稍自暇逸庶幾承先志而踵前
徽文武大臣等當共勵精勤電勉職業若以朕駐蹕郊圻欲節勞
勩將應辦應奏之事有意減少遲延則不知朕心之甚矣向來部
院及八旗大臣皆輪班奏事自仍照舊例行至諸臣中有陳奏事
件卽行具奏不必拘定輪班日期大學士等可通行傳諭知之○
庚午諭國家昇平休養戶口繁滋生聚日多蓋藏未裕儲蓄之方
不可不豫爲籌畫從來積貯以常平爲善但地方有司每以歲久
徵變易罹參處折耗補數貽累身家一見積穀稍多卽爲憂慮而
無識之上司亦遂被其搖惑而不爲緩急可恃之計獨不思民間
旣少蓋藏而倉庾又無儲備天時旱潦豈能保其必無一旦年穀
不登其何賴以無恐向有常平捐監之例後因浮費太多捐者甚
少遂漸次停止歸於戶部乾隆元年朕將捐款盡停而獨留捐監

一條者蓋以士子誦書向上者日多留此以爲進身之路而所捐之費仍爲各省買穀散賑之用所降諭旨甚明今再四思維積穀原以備賑與其折銀交部至需用之時動帑採辦展轉後期不能應時給發曷若在各省捐納本色就近貯倉爲先事之備足濟小民之緩急乎去冬侍郎孫國璽從晉省回京請將捐監事例移回本省朕降旨詢問該撫並諭他省不得援以爲例今思貯粟養民乃國家第一要務果於民生有益則當因時變通不必固執前議著各督撫確查所屬見存倉穀若干足敷本地之用與否若將捐監之例移於本省令捐本色於地方有無裨益各據本省情形悉心妥議若事屬應行卽將如何定例定數之處詳議具奏至於在外收捐則有包攬苛索種種弊端而積穀旣多則存七糶三出陳易新之際其弊更難悉數此皆該督撫所當隨時稽查盡心釐剔

俾閭閻實受常平之益官民無賠累之苦方不負愛養斯民之重
寄○癸酉以朱藻爲直隸河道總督顧琮協理河道事○乙亥諭
履親王自管理禮部以來恪愼周詳實心任事三年之內備極勤
勞今大禮已成禮部事務該堂官自循照辦理履親王不必兼管
○諭湖北忠崗等土司改土歸流增設施南一府統轄恩施宣恩
咸豐利川來鳳建始六縣除恩施係屬舊縣建始自川省改歸並
恩施分歸咸利二縣之田地人丁向有定額無庸另議外其餘改
土地方新入版圖者該督撫見在查勘分別升科但該土司向來
輸納秋糧不計田地多寡每年統計止納七十三兩六錢四分今
若照內地升科則徵收必至加於前數朕心愛養土民望其共受
國恩原不計貢賦之多寡乾隆元年曾降諭旨將容美司改設之
鶴峯長樂二州縣成熟田地卽照原額秋糧銀九十六兩之數作

爲徵收定額今忠崗土司與容美事同一例著將查明成熟田地
卽照原額秋糧銀七十三兩六錢四分之數按田分派作爲定額
無庸另擬科則俾土疆黎庶永沾薄賦之恩至乾隆二年未完秋
糧一併豁免○命福敏馬爾泰議政處行走○以王承堯爲內閣
學士由詹事遷○遣散秩大臣祥泰內閣學士岱奇冊封朝鮮國王李
吟子愷爲世子○準噶爾使臣達什等奉表至京表曰準噶爾台
吉噶爾丹策零奏言恭進 大皇帝聖明雍正年間 世宗憲皇
帝與我父當日情事 大皇帝既盡知之不敢復瀆陳近者屢欲
遣使恭請 聖安因前歲吹納木喀齋回 敕書內有爾誠遵
皇考前旨定界則遣使來不然亦無庸復遣之諭竊思遵照 大
皇帝諭旨我屬下人不得至阿爾台山實有未便儻冒昧陳請恐
有乖 諭旨勢不得已暫爾停遣去秋我邊界人言蒙古在我境

內安設卡倫攜二人來因念旣不得遣使事又不容中止不若卽藉此二人致書車臣汗令其轉達車臣汗報書令我繕奏遣使一切情事當代爲詳悉具陳故今復遣達什等入奏向來阿爾台山本係我部遊牧之地若盡令移駐山陰恐地窄不能容納多人請嗣後喀爾喀與厄魯特各照見在駐牧無相掣肘庶幾彼此兩安以廣黃教以息羣生伏祈 大皇帝鑒憫隨表進貂皮三十一張奏入 上諭軍機大臣曰閱準噶爾噶爾丹策零遣使求額駙策凌轉奏之疏甚屬恭順其事有易竟之機可遣使齎敕前往與噶爾丹策零將定界之事定議完結著侍郎阿克敦充正使御前三等侍衛旺扎爾乾清門頭等台吉額默根充副使將應議事件皆明悉曉諭之卽與準噶爾來使一同起程

二月癸未朔諭果親王持躬耿直賦性剛方辦理公事不避嫌怨

皇考素敦友愛眷注維殷朕御極以來命王總理事務方資倚任乃王舊疾時作去歲轉劇朕常加存問令御醫用心調治今年正月二十日太醫奏稱王病勢沈重朕欲親往看視因值齋戒之期特著和親王代往自此以後王疾漸減且精神稍增移住郊外林亭朕心喜慰方謂從此調理可望痊愈從容召見今聞薨逝深爲震悼著莊親王履親王經紀其後事朕卽於本日親臨其喪一應典禮該部速議具奏是日 上詣王邸第賜奠尋予加祭一次立碑造墳諡曰毅○乙酉奉 皇太后懿旨以皇六弟弘瞻爲果親王嗣襲其封○丙戌諭本年春季 文廟朕降旨親詣行禮查文廟春秋二祭舊例俱是遣官我 皇考尊 師重道始定親祭之禮開年舉行乃從來所未有者今覽太常寺奏進儀注朕躬獻爵一次其亞獻三獻之爵豫先陳設香案上朕思旣行親祭仍

當從三獻之儀著另繕儀注進呈○駐藏侍郎杭奕祿等奏貝勒頗羅鼐以額納特珂克部落拉克汗德忠那木札爾所上表文及貢物交臣轉奏查拉克汗德忠那木札爾乃呢瑪那木札爾之子父子並感國厚恩凡得準噶爾消息輒附頗羅鼐以聞自

聖祖仁皇帝 世宗憲皇帝數加恩賚今復進表貢物若更頒予敕命量施恩澤當益勸勉傾心內向奏入命賜德忠那木札爾敕書一道加賞段匹藝器有差○丁亥釋奠 先師孔子懸 御書

扁額 大成殿○壬辰命湖南平江縣漕糧改徵折色○命修山

海關邊牆○癸巳以岱奇爲刑部右侍郎

由內閣學士遷

○甲午 上御

正大光明殿噶爾丹策零使臣達什博濟爾入覲諭曰定界之事朕前降旨甚明今以額駙策凌奏請故許見爾等噶爾丹策零奏章朕已觀覽其與額駙策凌書亦經奏聞奏內稱喀爾喀與厄魯

特請悉駐牧如故彼此兩安庶幾推廣黃教休養羣生伏乞大皇帝鑒憫觀噶爾丹策零此次奏言極其恭順有誠心求和之意朕甚嘉之爾等舉止亦謹慎可嘉但於分界之處仍未指明尙屬蒙混蒙古游牧無常冬夏隨時遷徙若不指定山河爲界日後選人保無爭乎必彼此各守其界無得踰越庶可永固和好若噶爾丹策零未嘗明諭爾等爾等自不敢擅議朕當另遣大臣前往與噶爾丹策零詳悉定議又爾等曾告額駙策凌乞我國卡倫稍向內移卡倫之設由來已久於今豈得議移且噶爾丹策零奏中並未及此據爾等私見陳請不惟與噶爾丹策零所奏不符亦非爾等分所宜言也達什等奏言此係噶爾丹策零口屬不然使臣等何敢妄言今大皇帝旣許遣使自可與噶爾丹策零面議而定上復諭曰爾漫云噶爾丹策零口屬便爾瀆陳若朕遣使至爾部

彼不過遵旨而言何敢於敕諭之外復增一言朕爲中外共主無分喀爾喀與厄魯特咸一體視之並無欲益喀爾喀損厄魯特之意今噶爾丹策零請邊界人居住如故此事尚可俯允若乞我卡倫內徙殊未合理爾部邊界人且不肯移徙我 聖祖暨 皇考時舊設卡倫反可動耶朕於厄魯特尙無異視之心豈肯曲從爾意轉騷擾我喀爾喀乎凡事合於理朕無不允不然雖百請亦不允也朕卽日遣使噶爾丹策零其遵旨定議以固信好朕面諭之言爾等詳悉記憶歸告噶爾丹策零爾等臨行時朕尙有敕書付朕使者頒示噶爾丹策零知悉尋賜達什等銀兩段布有差○乙未 上啓鑾謁 泰陵○戊戌 上謁 泰陵○命公產旗地准民人置買○己亥祭 泰陵回鑾○辛丑 上幸南苑行圍○壬寅 上還京師○癸卯諭直隸宣化府屬懷來保安二縣採辦楊

木長柴供 郊壇 宗廟焚帛之用向無開銷之例俱係兩縣捐

貲繼因添用柴薪分派宣屬他縣協辦相沿已久朕思州縣公捐

易啓借端科派貽累小民之弊不可不防其漸著從乾隆三年爲

始將每歲需用楊木長薪照辦解之數動用正項造入地丁冊內

報銷令出產之懷來縣承辦以專責成○乙巳諭各省常平社倉

歉收借領免息著爲令○以徐家賓爲雲南布政使張坦熊爲雲

南按察使

由直隸天津道遷

○丙午

上御經筵

○丁未濬江南運河工

竣○己酉設臺灣北路義勝永勝二寨○湖北武昌府江塘成○

命元聖後裔五經博士東野衍兆恭遇視學大典一體陪祀觀禮

從衍聖公孔廣榮請也○庚戌暫免臨清天津兩關米豆稅○辛

亥 上親耕藉田三推畢加一推自是以爲常○王子趙宏恩以

納賄解任以高其倬爲工部尚書張渠爲湖南巡撫

由江蘇布政使遷

三月甲寅

上詣太學釋奠

御彝倫堂命講中庸尚書廣太學

鄉試中額召衍聖公孔廣榮等入見訓諭之賞賚有加○調許容

爲江蘇布政使以胡瀛爲山西布政使鄭禪寶爲浙江按察使

布政使

○乙卯諭陝西鑿井灌田一事從前隄紀辦理不善苟且興

工止務多井之虛名未收灌溉之實效經朕訪問降旨申飭命其

聽從民便毋拂輿情乃伊接奉諭旨之後卽檄行藩司轉飭地方

官務須挖深砌固不得草率從事又差遣佐雜等官分路勘驗凡

屬淺井悉令掘之使深而土易淤塞者則令修砌堅固其從前開

挖而未成井者又復勒令填平以至井底之寒泉無處灌注勢必

傾瀉於地中井中之涇土無處搬移勢必堆集於麥上不但麥苗

無益亦且大受其損況去冬得雪霑足今值麥苗青蔥秀發之時

農民及時鋤治轉盼播種秋禾東作方興正田功不遑之候而乃

迫令掘井砌井使農民廢時失業人心甚覺徬徨是朕諭令俯順輿情而崔紀則勒令深挖修砌以掩其非又令填平廢井以掩其過重負朕委任封疆諄切訓誨之意矣再者大學士查郎阿因見陝省收成歉薄穀價昂貴不得已禁止商販運赴他省曾經具摺奏聞而山西蒲州與陝西郃陽韓城等縣僅一河之隔彼地商販遂串通郃陽韓城等處奸徒指稱縣民羅買口糧舳舻相接揚帆直下一過河東卽達山西地界崔紀未曾究問陝西之人遂以崔紀庇護桑梓縱違禁之私販嘖有繁言觀此情形崔紀不便仍留西安之任著調補湖北巡撫將張楷調補西安巡撫速赴新任張楷到任後崔紀交代再赴楚省至秦省鑿井灌田之事張楷可善體民情妥協辦理○諭近京地方上年被水今春少雨民間米價昂貴朕心甚爲憂慮悉心細籌添設米廠減價平糶其他有益於

民食者莫不慮及原欲使閭閻小民易得升斗以爲餬口之計也乃發米日多而市價並不稍減轉或加增其中必有居奇之人糴買官米展轉糴買獲重利以肥身家是但知有己而不知有人矣獨不思太倉之粟原以備官兵俸餉之需今因民食維艱減價發糴此軫念民瘼之至意諒爲中外所共悉凡屬良民見朕如此焦勞如此露晷俱當感發善心縱不能出其所有以濟窮困奈何將官家惠養貧民之物轉爲一己圖利之資而坐視多人之謀食艱難曾不一動念乎又如京師錢文昂貴朕不得已設立官局以平市價而錢價近復加昂亦必有奸民囤積不肯輕售以待厚利者夫商賈卽百姓也朕一視同仁並無區別乃朕施一利民之政而伊等卽多一營私之謀何人心之不古難以化誨遂至此極耶至於八旗之人動輒望賞望借以濟匱乏不知國家經制有常爲政

有體豈有無端賞借以博衆人一時感悅之理且國家之有恩施亦如上天之有雨澤若雨澤下降而播種不豫力作不勤亦不能望收穫況一時之賞借猶如一時之驟雨可暫而不可常能給而不能足加之伊等又不能撙節愛惜隨手浪費於生計絲毫無補其裨益果安在耶朕實不忍兵民等之癡愚不悟特頒此旨再行曉諭各該管衙門可刊刻宣布俾人人觸發本心痛改惡習庶幾感召天和雨暘時若不獨蒙福佑於無窮而人心風俗亦可望漸歸於敦厚矣○復設八旗官米局○戊午以雅爾呼達爲內閣學士由太常寺卿遷○丁卯 上詣 黑龍潭祈雨○諭李世倬條陳改鑄錢文一事經九卿三議具奏凡廷臣會議之案原令各抒己見不必強同至於隨聲附和之弊乃人臣所當切戒者今此案三議覆奏正得各抒己見之義朕深取之不必以互異爲嫌但錢文關係

重大必須斟酌盡善著大學士悉心定議具奏尋議據吏部衙門
議稱欲平錢價必須改輕錢質竊思錢價之低昂原不在錢質之
輕重縱復再減二分錢價亦恐不能平且改鑄錢文與見在錢文
一體行使新舊夾雜重輕不一民間更易紛爭所議似不可行又
據尙書孫嘉淦議稱銅斤留供兩局鼓鑄外請將餘銅陸續分發
售賣竊思售賣餘銅止應於產銅之省聽商民購買市價若令運
解來京統入官局再分發售賣不獨徒費腳價轉滋紛擾卽論體
制亦屬未協所議亦不可行又據戶部等衙門議稱查歷來錢法
過重則慮私銷過輕必致私鑄今制錢酌重一錢二分若再減二
分與從前所鑄重錢一體使用則奸民必致銷毀重錢而鑄輕錢
李世倬所奏亦無庸議從之○命大學士九卿舉堪任道府人員
○以包括爲甘肅按察使

由山東登萊道遷

○戊辰賜準噶爾台吉噶爾

丹策零敕書曰準噶爾台吉噶爾丹策零前歲爾遣吹納木喀來
朕以廣教安民之故欲與爾議定疆界罷息干戈在朕甯有食言
之理爾誠遵我 皇考諭旨以阿爾台山爲分界止請喀爾喀游
牧稍令移徙勿動原設卡倫朕尙可俯允降旨指明喀爾喀游牧
所止之處乃爾並不遵旨反請以哲爾格西喇呼魯蘇爲爾邊界
如此則遣使何益故朕復諭以遵我 皇考前旨則遣使不然則
無庸復遣使降旨甚明此次爾令達什來致書額駙策凌又有進
朕奏章乞額駙轉奏朕故召爾使入見又閱爾奏內云請令喀爾
喀與厄魯特游牧俱照見在居住無相牽掣彼此兩安言已近正
但分界地名未經指明蒙古游牧無常冬夏隨時遷徙若不指定
山河爲界他日邊境細人或起紛爭仍難要久以爾奏言恭順故
朕特命大臣前來朕使到時爾與酌合機宜必使分界之事此次

卽得定議若仍不揆情理偏執己見託故推諉則於事無益卽往復遣使亦徒然耳朕爲天下共主凡各部民人皆欲令其安生並無彼此異視之意果事屬兩便朕無不允若有一不便任誰奏請總無偏聽之理爲此特降敕書命侍郎阿克敦侍衛旺扎爾台吉額默根同爾使達什等前往隨敕賜各色采段十端命額駙策凌亦致書噶爾丹策零隨書用各色采段四端○濬東便門護城河○庚午召劉統勳回部辦事○壬申以旱命刑部清理庶獄○癸酉命大學士鄂爾泰等照元年例舉任文衡者仍令一體考試○丁丑禮部議覆尙書銜徐元夢奏魯論所記四科止就陳蔡諸賢記載後人據此定爲十哲從祀文廟正殿嗣以顏子升配先師因升顓孫子師於殿以補其數聖祖仁皇帝又以朱子熹昌明聖教升位其次是十哲可不必拘矣考魯論次章卽載有子之說

其言行氣象皆與聖人相似則有子若宜得升堂配享確然無疑
再如宰子子冉子求一因短喪有不仁之斥一因聚斂有非徒之
責論者謂宜移祀兩廡其兩廡中如南宮子适宓子不齊俱以君
子見稱孔子自宜並予升配等語謹按十哲之祀昉於唐開成至
宋咸淳升子張以補缺數以孟子稱得聖人一體故也有子若最
爲游夏所服孟子亦稱智足知聖從前未躋十哲實爲缺典應如
所請升有子若於殿內東旁卜子夏之下移朱子熹於西旁顓孫
子師之下通行國子監直省府州縣學一體遵奉至宰子冉子皆
聖門高弟未容輕議其餘諸賢經稱許者甚多亦豈能槩躋十哲
所請兩廡升配均毋庸議從之○戊寅諭督撫升調非特奉諭旨
均俟交代後起程○己卯命考選科道一體引見○禮部議覆河
東河道總督白鍾山奏陳留縣廟祀河神黃守才偃師縣人靈顯

昭著宜加封號從之賜號曰靈佑襄濟之神○辛巳以直隸旱截留北倉米二十萬石備賑

四月甲申諭各省督撫向來有進貢方物之例朕御極之初卽降諭旨令三年之內停止進貢俟卽吉後再行請旨數月以來雖各省督撫尙未舉行但朕思此事甚屬無益蓋進貢之意不過曰藉此以聯上下之情耳殊不知君臣之閒惟在誠意相孚不以虛文相尙如爲督撫者果能以國計民生爲務公爾忘私國爾忘家則一德一心朕必加以獎賞若不知務此而徒以貢獻方物爲聯上下之情則早已見輕於朕矣且朕見在諭令督撫等毋得收受屬員土宜誠以督撫取之屬吏屬吏未必不取之民閒目前所受雖微久之必滋流弊若進貢方物雖云督撫自行製辦而展轉購買豈能無累閭閻是所當行禁止者惟織造關差鹽差等官進貢物

件向係動用公項製買以備賞賜之用與百姓無涉不在禁例其督撫等有牧民之責者槩行停止貢獻○以旱申命求言○僧格免以納延泰為理藩院尚書由刑部左侍郎遷○大學士管川陝總督查郎阿參奏承辦軍需道沈青崖等私運侵帑詞連前任陝西總督劉於義遣馬爾泰往鞫解劉於義吏部尚書任○戊子撥山東德州臨清倉穀於直隸備賑○己丑調孫嘉淦為吏部尚書以趙國麟為刑部尚書孫國璽為安徽巡撫由兵部侍郎遷○壬辰諭直隸總督事件繁多難以兼顧河務李衛不必管理其一切河工事宜應交總河專辦俾事權歸一方有裨益顧琮仍著會同朱藻悉心辦理○癸巳命納延泰議政處行走○丁酉減安徽懷遠武平兩屬屯田科則○己亥命九卿等舉劾月官○命各直省題奏本章按季咨內閣通政司查覈○辛丑調二格為工部右侍郎以班第為兵

部右侍郎勒爾森爲理藩院左侍郎

由鴻臚寺卿遷

○以王保爲理藩院

右侍郎

由理藩院郎中遷

○壬寅諭今日御史李賢經具摺條奏事件其

閒頌揚之詞甚多如德尙寬仁政從簡易廣開言路納諫如流等語朕臨御以來雖夙夜孜孜勤求治理而一切敷施措置豈能悉協於中撫己捫心實難自信時時省惕今見臺臣極口稱揚益重朕之愧也且朕之行事其是非得失當聽天下後世之公論尤不在進獻之諛詞從前已降旨訓飭今李賢經又蹈此習特再曉諭俾眾知之至其條奏內稱天下之事繁則擾擾則勞勞則倦應請嗣後在內各部院在外各直省所辦一切瑣屑事務不必盡煩睿覽其無益於治道或有傷於治體者請內會九卿外飭督撫公同酌議可裁減者裁減宜禁革者禁革如果事關重大方請斷自上裁所謂勞於求賢逸於任人等語從來爲政之體自應總攬大綱

不規細務然而因時制宜亦有不可以槩論者昔我 皇考卽位之初庶務紛繁有不得不兼綜整理之勢是以雍正四五年以前殫心竭慮日昃不遑其精勤勞瘁之心實從古帝王所罕有朕承百度維貞之後率由舊章遵循惟謹較之 皇考之時已覺前任其勞而今享其逸矣然此亦當時會之適然耳若使目前有應行辦理整頓之事如 皇考當日之情形則朕心亦必眊勉效法竭蹶靡甯詎敢圖旦夕之暇豫乎朕此時之宣猷布政斟酌緩急權衡輕重固不敢廢弛而叢脞亦不致瑣屑而紛更此朕心可以自信者若如李賢經所奏將諸事委之臣僚而朕居九重之上端拱無爲則廢弛叢脞之弊必不能免不但心有未安卽揆之於理亦斷乎其不可也況朕春秋方富年力正強乃勵精圖治之始凡節勞省事之說尤不當陳之於今日也又條奏內稱土地不增稅糧

如故經費之數亦應調停在官吏則職業不加於昔而雙俸已倍於前在太倉則輸納不益於前而賑糶幾倍於舊源少易窮後將安繼等語此奏甚屬錯謬朕之加恩官僚雙俸者原非博惠下之美名冀人之感頌也蓋以厚其恩贍方可固其廉恥冀臣下自知興廉興義恪共乃職之意儻俸祿既增而仍有貪汙受賄不守官箴者朕必按律治罪不稍寬假此正激清吏治之一端不必於臣工養廉之典較此多寡之數也至於太倉之粟見在有三年之蓄不爲不裕況國家儲積以備不虞所謂不虞者正謂年歲荒歉黎民艱食以此平糶散賑惠濟閭閻俾不至於饑餒若此時而不用倉穀又於何處用之豈有太平無事之秋而必專指兵革之虞以爲不虞之備乎又條奏內稱進退人材之際當嚴邪正之辨必須權衡在己兼採眾論使好善惡惡輕重長短不齊之限量一一中

乎當然之則無少差謬等語虞書曰知人則哲惟帝其難之蓋爲治之道莫難於用人而用人之道莫難於分別邪正自古人君斷無有知其爲邪而用之知其爲正而斥之之理惟是隱微難明疑似難辨以致舉錯不當用舍失宜其辨別之法欲採輿論而輿論每不可憑欲加密訪而密訪又不可信若立科條以爲鑑別進退之標準則所立之法卽爲百弊之所叢生矣此實難之又難有莫可名言者又條奏內稱各省軍政所薦或號令嚴明弓馬嫻熟或持已廉潔諳練營伍不過此數事求其洞曉韜畧謀勇兼長深得士心若孫臏穰苴吳起者其人不多見請於本京設韜畧之科廣爲收羅等語夫所謂弓馬嫻熟營伍諳練等事尙係實而可見者至於韜畧運於一心其神明變化之妙全在當機猝應平居無事之日何從試驗而知之若設韜畧之科採其議論便加錄用不過

如目前試士之策論半屬紙上空談何以定將才之優劣乎况孫
臆穰苴吳起數人乃不世出之才卽求之史冊中亦不多得而李
賢經乃於近今武途中援以爲比不亦大相逕庭耶朕見伊條奏
特就一時所見指出數事以朕意宣示但伊所奏款項甚多其中
不無可採者著大學士會同九卿閱看定擬具奏尋議考績之典
三年舉行遵行已久况卓異之外又有行取保舉各途如有實心
愛民之員各省督撫自可循例保薦正不必又定以歲擢一二人
之例徒事紛更各省督撫提鎮皆由特旨簡拔所屬員弁儻有廢
弛滋事冒功構釁自必加意查察參處卽大臣升轉加銜官弁保
舉議處見在俱有成例均不必再行更張邊境倉儲原屬緊要但
查先經戶部議覆大理寺卿汪滢摺奏直隸各省州縣酌量地方
之大小戶口之多寡分別加倍積貯以備不時之需其應買穀若

干應動何項銀兩以及作何採買貯倉之處俱已行令各督撫妥議經畫至所稱鎮守之兵必諒其性習土宜以便人情則直隸山西川陝以及雲貴沿邊等省俱係於土著內召募充伍卽見在調遣兵丁北路換班西路駐防者俱於附近營分派撥並無南北易地不便人情之處且有定例賞軍功給糧餉養家口儘足以示鼓勵何必另立勳格若夫邊關墻垣屯堡各該督撫提鎮久經相度建造修葺緊要地方皆有大員彈壓按汛防守各有專責何至有互相推諉之事該御史所奏均無庸議從之○轉岱奇爲刑部左侍郎以鍾保爲刑部右侍郎○癸卯增廣西各營兵額○甲辰諭各省所有學田銀糧原爲給散各學廩附食生之用但爲數無多或地方偶遇歉年貧生不能自給往往不免飢餒深可憫念朕思伊等身列膠庠自不便令有司與貧民一例散賑嗣後凡遇地方

散賑之時著該督撫學政飭令教官將貧生等名籍開送地方官
覈實詳報視人數多寡卽於存公項內量撥銀米移交本學教官
均勻散給資其饑弱如教官開報不實給散不均及爲吏胥中飽
者交督撫學政稽察卽以不職參治至各省學租務須通融散給
極貧次貧生員俾沾實惠此朕體恤貧生之意若生員等不知感
激自愛因此而干預地方恃有生監護符以致肆行種種不法之
事該督撫等仍應照例查察毋使蹈於罪戾○丙子內閣學士吳
金以奉使挾私妄奏革職○戊申轉吳應棻爲兵部左侍郎以凌
如煥爲兵部右侍郎由內閣學士遷○辛亥命見任教職中式准留任
五月癸丑諭王大臣等據漕運總督查克丹奏漕船過淮之後尙
須經歷各處閘壩方能渡黃自四月起運河之外清口之內湖水
微弱黃水漸盛河流倒灌停蓄沙淤以致清口風神廟前積有橫

埂二道各寬十餘丈糧船輕者起剝重者守候經河臣委員挑挖並添築草壩攔截湖流束水衝沙無如旋挖旋淤一時未能暢達等語朕思湖水之弱或係運河已開深通而湖水流入運河者過多故其勢弱不足以刷黃耶抑或高斌去年請將運口舊制稍改爲曲灣雖清流可以濟運而緩水不能敵黃遂用此有橫埂耶從來治水機宜惟在隨時利導成法具在可循而不可拘爾等卽寄信高斌令其詳細籌度務使淤沙盡去運道暢達毋致阻滯糧運或並河道更費周章可也尋奏清口淤淺實因黃水一時過盛兼之東北大風所致係黃盛於清非清水比前微弱及入運過多之故今一雨之後風恬浪靜黃水平退湖水立時暢出淤淺之處衝刷寬深清口通利已有明驗至運河挑濬不過就淤淺處開挑非大開深廣萬無入運過多之事至運口改入三汊河之內形勢稍

灣正爲將入運之水減少分數不令過多而清口全湖之水自裴家廠張福口等引河暢出形勢通順並無灣曲之形及多分入運之患臣伏查明臣潘季馴河防一覽書載防清口淤澀一條云偶遇黃水先發淮水尙微河沙逆上不免淺阻然黃退淮行深復如故不爲害也正與今日清口情形適合得旨覽此奏朕懷釋然○丁巳諭直隸河工樁手准食戰糧○辛酉貴州定番州逆苗滋事總督張廣泗派兵討平之○甲子予故大學士連柱祭葬諡文恭○丙寅定各省水旱災五分卽准蠲免例○丁卯諭黑龍潭龍神福國佑民靈顯素著每遇京師雨澤愆期祈禱必應是明神功德實能膏潤田疇順成年穀爲萬姓之所仰賴昔年皇祖式廓廟貌建立豐碑皇考又復易以黃瓦用昭敬禮今應加封號以示尊崇大學士會同該部定議具奏尋加昭靈沛澤神號四字

○庚午諭副將參將引見督撫覈實加考○辛未諭楊永斌久歷外任聲名素優是以用爲蘇州巡撫近聞伊年將七旬精力不逮難勝繁劇之任著來京署理禮部侍郎蘇州巡撫員缺著布政使許容署理蘇州布政使著徐士林前往署理朕因蘇藩事務緊要一時不得勝任之人不得已命徐士林往署且伊服制亦將屆期滿況又與實授者有別徐士林可卽由本籍起程來京請訓再赴新任不必以服制未滿固辭○壬申命江西湖南運穀接濟福建○甲戌諭王大臣等近看李衛辦事甚屬麤率不似從前昨已降旨訓諭今覽奏雨水麥收情形之摺其中錯謬之處甚多如奏稱連日忽陰忽雨見在入土尺許尙未透足等語天下豈有得雨尺許而尙未透足之理明係雨澤短少而爲捏飾之奏觀此則從前所報未必尺許者竟屬全無雨澤矣又稱麥收已畢市價平減誠

恐麥賤傷農等語自古穀賤傷農之說原指屢豐之後而言然亦非常理况直隸地方舊歲旣屬歉收今年麥秋長短不一以此日之情形而爲麥賤傷農之說豈不背謬乎又伊所開米價單內保定府稻米每一倉石價銀二兩六錢至二兩七錢五分稱爲價中大名府稻米每一倉石價銀一兩七錢五分至二兩一錢四分稱爲價賤豈有如此米價尙得爲中尙得爲賤乎朕念切民依固不肯以年歲歉薄委咎於督撫然亦豈可置之不問蓋督撫身膺民社之職凡遇雨暘年穀最緊要之事當倍極周詳慎重庶能上感天和下紓民困今陳奏於朕前者尙且如此則其辦理措施豈能妥協大出朕意料之外可傳旨訓飭之尋李衛奏覆備陳感悚得旨汝先不是此撻人其所以忽而至此者朕實不能解其故慎之勉之○乙亥諭前都察院奏九卿等驗看月官時有素知其品行

端謹或才具優長者卽填入名單以爲引見時酌調繁簡之助朕批准施行今刑部郎中王槩奏稱此例一行恐九卿詹事科道中袒護知交曲徇戚誼始以情託繼以賄求而借端招搖指名撞騙之弊俱從此生等語從來人君敦治用人爲最要而知人爲最難內而訪之九卿外而問之督撫此卽詢四岳闢四門之義雖諸臣之中公私未必一致將來徇情作弊之事亦未能保其必無然經朕覺察自有國法不容寬貸而未事之先朕則不忍存逆詐億不信之心因噎廢食將延推公舉一槩竟置不用也況自舉行以來九卿驗看月官尙未有填註薦語者豈有出令未允又欲遽議更張朕之令諸臣不時條奏並許司官參領等亦得奏事者一則欲博採衆論以資治理一則觀其陳奏可以知其人之識見才具如何諸臣旣奉詔進言必當有關於國計民生之要務或朕躬闕失

或政事乖差據實指陳朕不難收回成命今觀諸臣所奏並無譏
論嘉謨不過就目前一二時事反復辨論朝更夕改從來國家政
務必行之數年而後可以徐收其效焉有取必於旦暮閒者卽如
禁銅一案議論卽不一而無所適從若以爲當開則旣開禁之後
錢價未必平減若以爲當禁則從前禁止多年銅斤之缺少如故
並未見其充盈今日之言當禁者何不早言之於開禁之日也諸
臣之條奏朕多敕交部議若部臣皆以不行議覆又似不體朕從
善如轉圜之意者依違遷就姑且准行則徒事紛更而無益於政
治朕熟察近日情事如此因王樞條奏特頒此旨曉諭諸臣共知
之○戊寅以喀爾吉善爲內閣學士

原任兵部侍郎

六月癸未 上憂旱虔禱自是日至甲申大雨○諭向例外省主
考官聞命之日卽速就道蒙 皇考世宗憲皇帝念其辦理行裝

未免忙迫伊等既奉命典試自知奉法惟謹不必過於防範特令稍寬起程之期此體恤臣工之厚意也近聞奉差諸臣起身甚遲有至十餘日外者殊非遠嫌之意著禮部酌定日期著爲定例尋議雲南四川貴州廣東廣西福建湖南七省以十日爲限浙江江西湖北陝西江南五省以七日爲限河南山東山西三省以五日爲限逾限參奏從之○諭朕聞雲南麗江府原係土府於雍正二年間改設流官比時清查田地戶口時有土官莊奴院奴等類共二千三百四十四名伊等並無田糧皆願自納銀以比於齊民每名編爲一丁每年納銀六分六釐共徵丁銀一百五十四兩七錢零迨滇省民丁改爲隨糧派納而此項夷丁不得與有糧之戶一例攤派至今照舊徵收其中不無貧乏之家艱於輸納者著該督撫查明槩予豁免俾邊地夷民永無催科之擾○乙酉諭朕聞江

南州縣徵收錢糧有加增火耗之處可傳諭那蘇圖許容等嚴查
閭屬如果有劣員暗地加耗立即題參治罪以爲殃民肥己者戒
但以朕所聞江南如此恐別省亦有此風不急爲查禁則貽害百
姓將不可言朕御極以來政崇寬大而人心澆薄漸啓玩縱之端
以爲不妨稍有假借不知所謂寬大者乃愛養良民俾無失所求
盡父母斯民之道耳非謂舉殘暴害民之輩而悉寬之也卽如獨
租稅以裕物力減重賦以恤民艱水旱偏災立行賑恤雨暘愆候
先事綢繆無一不爲民生起見至於官吏處分之從寬者非其心
有可原則由才尙可用刑章護罪之從寬者非其情原可憫亦必
迹在可疑若謂貪官污吏一切包容惡棍奸民槩從釋宥以示寬
大是滋稂莠而妨嘉穀縱虎狼而賊生靈殘忍酷虐無過於此尙
何寬大之有前後屢頒諭旨至爲明切而尙誤以玩縱爲寬大是

非誤會朕意直任意行私腴脂膏而肥囊橐乃國法之必不可宥者矣從前火耗未經提解州縣恣意橫徵飽其谿壑苦累百姓是以皇考允各省督撫提解火耗之請而優給各官養廉令不得額外巧取所以懲貪風而紓民力用意誠善卽養廉稍薄之州縣亦必就其所辦事務酌予足用該員量入爲出自無不敷何得暗加重耗刻剝小民以爲自潤之計情罪至爲可惡該督撫等不時體訪如有不肖州縣於應收火耗外絲毫加重者立即題參嚴行治罪如不行覈察經朕訪聞確實必將該督撫一併嚴加議處斷不姑容○命各部院引例不得刪減亦不得例外兩請○丙寅以唐綏祖爲廣西按察使由太常寺卿遷○丁卯河南巡撫尹會一奏豫省折中之法始自明朝至我朝復經丈量定則民間承業完糧百年有餘相安已久今欲釐定科則非履畝丈量實難憑信設一丈

量必致妨廢農業紛擾閭閻若舍此而令里書開報業戶自陳則
飛灑捏飾諸弊叢生是除弊適以增弊於民更多未便請將涪州
等二十四州縣並延津收併之昨城縣地畝錢糧仍各照舊制折
中行糧停其釐定科則以免滋擾從之○戊子葛森因病解任以
吳拜爲盛京刑部侍郎由內閣學士遷○乙未諭從來利之一字乃聖人
之所不諱而爲賢者之所謹防易乾文言釋元亨利貞曰利者義
之和也利物足以和義繫辭曰理財正辭禁民爲非曰義論語亦
曰因民之所利而利之與周易正相發明惟放利自私則不可耳
蓋義利本非兩截用以利物則公而溥是利卽義也用以自利則
貪而隘是利卽害也後人但見言利之害遂將義利判然分爲兩
途如冰炭水火之不相入孟子恐人舍義言利日趨於害而不自
覺所以有何必曰利之說也所謂利物者以百姓之貨財謀百姓

之衣食上之人不過爲之董率經畫而已所謂自利者措克聚斂
取下民之脂膏充朝廷之府庫以致民力益竭民怨日增其爲害
孰大焉今鄂彌達奏請廣東潮州府屬海陽六縣民隄請借給商
人關稅銀十萬兩營運生息次第興修經戶部議准御史陳高翔
以爲督臣不應言利復行條奏朕交爾等會議又各抒所見兩議
進呈朕覽後議以借帑營運辦理公事爲非持論未嘗不正但經
理天下之事必須總攬全局期於可行如海陽等六縣隄岸係小
民自修之工程因其力量不足是以仰賴官修而廣東所有公項
又不敷本省公事之用不得已而爲營運之舉但廣東商人資本
無多往往不惜重利向人借貸以圖利息是以向來皆借給帑銀
出息收鹽以爲裕商之計今借給官稅銀兩既可稍紓商困又可
裨益民田頗稱兩便若以借帑築隄爲不可行則商人之借帑收

鹽亦不可行矣推而至於內外惠濟兵丁銀兩皆營運出息之所
出若以生息爲非則向來之賞資兵丁以爲吉凶之用者可以一
旦中止乎兵丁惠濟旣不可中止而國家之經費有常又何從措
辦此格外之恩賞乎將來有人援照海陽隄工之例以請停止營
運者爾等其將議准乎抑議駁乎可知議天下事者本有因時制
宜之道識見不可不廣也夫以義爲利以利爲利之辨朕籌之已
審目前實有不得不通盤算計權宜辦理之勢如果將來國用充
盈百姓家給人足則見在施行之事又何不可變通之有此案著
照前議行可將兩議並朕諭旨俱行頒發俾各省督撫知之若非
大有益於民生之事而輒以生息營運爲辦理公事之善法則又
不知爲政之體者矣○丙申定八旗家奴開戶例○戊午命內外
糾參六法官願引見者聽○准江蘇買洋銅○頒鐵斛○辛丑諭

一月以來京師喧傳尙書孫嘉淦密參在朝大臣多人如大學士
鄂爾泰張廷玉徐本尙書公訥親尙書海望領侍衛內大臣常明
皆在所參之內是朝中大臣得免者鮮矣諸臣皆係朝廷簡用之
人守法奉公實心盡職並無可指摘之處而鄂爾泰張廷玉尤係
皇考特簡之大學士爲國家之棟梁以孫嘉淦較之識見才猷
豈能與二人爲比朕特以其操守廉潔向有端方之名故屢次加
以擢用非以其才識在二人之上也如果其才識在二人之上朕
何難卽用爲大學士而仍在尙書之列乎且朝廷政務繁多正賴
宣猷佐理之羣彥豈有將諸人悉行罷斥而專用孫嘉淦之理乎
至於伊密參之語毫無影響如果諸臣有可參之事孫嘉淦身爲
大臣何不可登之露章而乃見之密奏旣云密奏惟有孫嘉淦自
知之伊又豈肯漏洩於人以招眾怨乎朕不知造作譌言之人是

何肺腸或忌嫉孫嘉淦之人見朕將伊升用而造爲此說以排擠之耶或趨附孫嘉淦之人欲相引重而造爲此說以揚其特立獨行之直名耶此語朕聞之已將一月而都察院堂官及科道等遇此等應行參奏之事何以默無一言也若置之不問則造謠生事之人方且以爲得計而無知之官員或且疑爲實有是事將見黨援門戶之風從此而起無所底止矣前我 皇考因都下譌言甚多曾降諭旨令步軍統領五城御史等訪拏重懲此風稍息今復蹈故轍於國體大有關係但此事傳言已久目前姑不深究止令步軍統領巡城御史嚴行禁止之嗣後如有此等造言之人必當查拏根究其所自來重寘於法以杜人心風俗之害至於大小臣工有陳奏事件既不見之明本而用密摺便當加意謹慎不令一人知之方合謀猷入告之義且朕見諸臣有參奏彈劾之類外人

每不能得其確耗而加恩沛澤之舉則諭旨未發之前或諭旨既發之後外人往往傳播知爲某人之奏豈非向人陳說以爲居功干譽之計乎朕爲天下主一切慶賞刑威皆自朕出卽臣工有所建白而採而用之仍在於朕卽朕之恩澤也豈以諸臣市惠爲嫌而較量一時之稱道但國家辦事有體名不正則言不順如事之不當密者卽應明見之章奏如用密摺封達朕前者必係當密之事而又宣露於人其居心尙可復問乎事君之道當如是乎朕御極以來崇尚寬大內外臣工當加倍恪慎益矢公忠以成朕寬大之治若因禁令稍疏始而廢弛漸且流於踰閑蕩檢是諸臣自干罪戾國法具在豈能曲爲寬假耶此意朕於雍正十三年卽宣示臣工矣奈日久怠生今因一二近事並將朕衷宣諭令內外諸臣共知之○予唐儒韓愈裔世襲五經博士○癸卯命湖南撫恤貴

州難民○除廣東崖州虛升地畝額賦○乙巳增苗疆府州縣養廉○以福十寶爲內閣學士由上詹事遷○丙午左都御史楊汝穀乞休允之